



Nuuk 27. Januar 2015

UPA 2015/31

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Inuiaqatigiit kissaataat tunngavigalugit nunap ilaani aatsitassarsiorfissanik inerisaaviusussanik pilersitsinissaq aammalu nunap ilaani allani avatangiisit, ilorrisimaarneq, inuussutissarsiutit pioreersut assigisaalluunniit tunngavigalugit aatsitassarsiorfigineqarusunngitsunik pilersitsinissaq pillugu oqallisissiamik saqqummiusseqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut. Oqallisissiaq innuttaasunik, soqutigisaqatigiinnik aalajangiisartunillu peqataatitsinikkut amerlasuunit akuuffigineqartumik oqallinnissamut toqqammaviusaaq. Oqallisissiaq 2016-imi upernaakkut ataatsimiinnissaq nallertinnagu naammassineqareersimassaaq.

(Inuit Ataqatigiit Inatsisartuni gruppianni ilaasortat)

Tunngavilersuut

Isumaqaarpugut aatsitassarsiorneq pillugu oqallitarnerni sammisamut ataatsimut tunngasoq eqqartussallugu sumiginnartarsimagipput. Aatsitassarsiornermik timip piisigut qanoq piorsarusunnersugut oqallisiginikuunngisaannarparput. Nunatsinni sumiluunniit killilersuinertaqanngitsumik aatsitassarsiortoqartassava imaluunniit arlaanni peqarusuppugut aatsitassarsiorfigineqaaqqusassaangitsunik?

Nunap ilaanik aatsitassarsiorfigineqaaqqusassaangitsunik pilersitserusunneq assigiinngitsunik patsiseqarsinnaavoq. Inuussutissarsiutit pioreersut, pinngortitaq qajannarluinnaqqissaartoq, qanittuani inoqarfiit il.il. patsisaasinnaapput.

Nunatsinni aatsitassarsiornerup amerlasuunit tapersersorneqarnissaa pingaaruteqarpoq. Taamaamat pingaaruteqarpoq sammisamut tassunga tunngatillugu innuttaasut oqaaseqarnissaminut periarfissinneqarnissaat. Inoqarsinnaavoq aatsitassarsiornermut akuersaarluartunik, taamaattorli sumiiffimmi aalajangersimasumi aatsitassarsiortoqarnissaanut qulartunik. Nunarput aggornernut immikkoortitertuugutsigu nunatta isikkuanut ilaatillugu siunissami aatsitassarsiortoqarnissaa amerlasuunit isumaqataaffigineqartoq qulakkeersinnaavarput.

Soorunami siunissami nunap ilaata aggornernut immikkoortiterneqarnera akuersissuteqarluni maannakkut ingerlatanut sunniuteqartussaangilaq. Kisiannili siumut sammisumik ataatsimoortumillu akisussaassuseqarluni oqallittoqarnissaa suli angumerisinnaavarput.

Pisortani aningaasaqarnikkut allaffissornikkullu kingunerisassaat:

Nalilernerqarpoq oqallisissiornerpiartaa ukioq kaajallallugu AC-itut sulinertut 500.000 kr.-inik akeqassasoq. Nutserinermut allanullu atugassat tamatuma iluaniipput. Ilimanarportaaq oqallisissiornerup ingerlanerani oqallisissiap imarisaanut tunngatillugu suleqataasunik naleqquttunik suliamut tunngasunik oqaloqatigiittarnissamut allaffissornikkut isumalluusiisoqartariaqassasoq. Tamatuma saniatigut inuppalluttumik oqallinnissamut toqqammavissiisussanut atuagaaqqiorsinnaanernut, isiginnaarutikkut naatsunik aallakaatitassiorsinnaanernut atortussiorsinnaanernullu allanut ilassutinik aningaasartuuteqarnissaq naatsorsuutigineqartariaqassaaq. Suliniummut aningaasartuutissat pingaarnersiuinermi killiliussamut pulatinneqartariaqarput, tamannalu pisinnaavoq suliniutinik allanik tulleriissaarinermi tunullinngortitsinikkut.

Namminersorlutik inuussutissarsiortunut aningaasaqarnikkut allaffissornikkullu kingunerisassaar:

Namminersorlutik inuussutissarsiortunut aningaasaqarnikkut allaffissornikkullu imaasiallaannaq kinguneqassanngilaq. Oqallissiaq nunap aggornerinut immikkoortiterinermut toqqammavissiissappat tamanna soorunami namminersorlutik inuussutissarsiortunut kinguneqassaaq. Taamaammatt oqallisissiap iluaneereerpoq oqallinnissami aggersumi suliassami peqataasut tamarmik tusarniaavigineqarnissaat.

Innuttaasunut aningaasaqarnikkut allaffissornikkullu kingunerisassaar:

Siunnersuut aatsitassarsiornermut inuit tatiginninnerannik qaffassaanermut ilapittuutaasinnaavoq aalajangiisarnernullu innuttaasut piginneqataasutut misiginerannik annertusaataasinnaalluni.